

CSS 1920 - 1995



**Cronica dal club in occasiun dal giubileum da
75 ons Club Skiunzs Sent**

compilada da

Cla Sarott

75 ons Club Skiunzs Sent

Festina in chasa da scoula da Sent dals 21 schner 1995

Melodia. Aroser Skischullied dad Arthur Schmidt, 1937
Pleds: Cla Sarott cun agüd da seis bap barmör

1. *In scoula eschna radunats, ho ho ho
skiunzs in grondas quantitats, ho ho ho
per gratular al Club da Ski,
chi settantitschinch hoz ha cumpli,
ans allegrain da quist success,
cha'l Club fetsch'inavant progress!*

*Refrain: Culs skis sun its noss perdavants
fat gitas hana tants e quants
amunt cun pels, tras puolvr'aval
nun es quai maximal?
Eviv'il Club da Sent!*

2. *Pro üna tala occasiun, ho ho ho
vain fat pel solit eir menziun, ho ho ho
da quai chi'd es passà plü bod
d'ürant il di ed eir la not.
Quai cha tschertüns pel Club prestà
dess gnir in quist lö menzunà.*

Ref: Culs skis sun its ...

3. *No lain ans algordar be cuort, ho ho ho
l'ide'es gnüda aint in Zuort, ho ho ho
davo la tura da Laver.
Als 24 dal mais schner
s'ha lur'il Club constitui
in „Peckerei“ e na ui!*

Ref: Culs skis sun its ...

A Sent, ün cumün da paurs, la politica e las robas importantas gnivan fattas giò'n ui, ma il club da Sent es propcha gnü fondà e sigilà in üna „Peckerei“ e quista peckerei d'eira quella da sar Jachen Werro aint a Bügl Süt sur l'Hotel Rezia, hoz magazin da l'Impraisa electrica.

8 amatars da la natüra e dal sport da skis vaivan passantà la saira sül „Jägerstübli“ da l'Ustaria Schigliana, ed i d'eira gnü ter tard. L'idea nada pacs dis avant in Zuort

nu d'eira amo cuada oura cur chi han cumanzà a metter las sopchas sün maisa. Tanter quists 8 d'eira pro ün furner chi staiva ir a far pan, e pe chi possa gnir trattà a fin e protocollà inandret han stuvü ir tuots cun Mario Giacometti giò la peckerei: Quists venerabels homens da Sent chi han gnü l'idea fantastica da fondar ün club da skiunzs avant ca. precis 75 ons d'eiran ils seguaints:

Georg Küng,	falegnam,	4.4.1883 -	1964	81/37
dr. Jon Peer,	meidi a Sent,	8.3.1884 -	18.2.1933	49/36
Niculin Zonder,	geometer,	9.3.1884 -	11.12.1963	79/36
Emil Bass,	ing. forestal,	10.6.188 -	8.6.1974	79/36
Richard Margadant,	toler,	25.4.1892 -	2.2.1965	88/34
Domenic Linsel,	pittur,	8.3.188 -	7.3.1963	69/26
Mario Giacometti,	furner,	12.9.1894 -	30.8.1954	60/26
Cla Valentin,	faver,	21.3.1895 -	12.7.1976	81/25

Il plü vegl d'eira Küng, il plü giuven Cla Valentin, sco prüm ad ir culs skis aint il paradis es i Jon Peer, la plü ota età ha raggiunt cun 88 ons silvicultur Bass e sco ultim dals fondatur es i a megladra vita Cla Valentin.

4. *Il Club es gnü fondà la not, ho ho ho
perquai fain no adüna flot, ho ho ho
las uras pitschnas nu nu tmain
adüna jent no festa fain
ans allegrain fich sülla naiv
e fain pel Club eir mincha plaiv !*

Ref: Culs skis sun its ...

Plaivs vaivna plü bod, impustüt d'ürant ils prüms ons, bler plü pacas e plü pitschnas: Il president faiva svesa eir amo l'actuar, il chaschier nu vaiva da scriver plü co 8 fin 12 lingias, e l'unic revisur ha fat dal 1920 inavant 32 ons in fila sia plaiv!

Perquai gnivan fattas fin 3 jadas al mais d'ürant l'inviern sezzüdas cun tuot il plenum, sco radunanzas generalas, bannidas dal mas-chalch cun seis taloc - bliers ons d'eira quai sar Peder Fried, chi survgniva lura ün büman da 5 francs dal club.

Manzunain ün jada ils presidents:

1920 – 1932	Richard Margadant
1933 – 1935	Cla Valentin
1936 – 1937	Georg Küng
1938 – 1940	Richard Margadant
1941 – 1943	Michel Bazzell
1944 – 1946	Flurin Denoth

1947 – 1950	Michel Stupan
1951 – 1952	Nical Stupan
1953 – 1954	Plasch Bardot Lansel
1955 – 1956	Christian Clot Schmidt
1957 – 1960	Tinet Werro
1961 – 1966	Jacob Benderer
1967 – 1970	Richard Gartmann
1971 – 1972	Georg Buchli
1973 – 1976	Fluri Pinggera
1977 – 1982	Richard Gartmann
1983 – 1988	Reto Buchli
1989 – 1994	Christian Horber
1995	Georg Salomon

5. *In nos rapport, quai sainza fal, ho ho ho
sarà eir paiver, na be sal, ho ho ho
ch'ingün nu saja sparmalà
sch'el gnac'ün zich vain manzunà
quai es per nos divertimaint,
chantain pür tuots cun cour cuntaint:*

Ref: Culs skis sun its ...

Sper ils noms manzunats avant sco presidents chattaina aint ils protocols dal 1933 fin 1946 ils seguaints:

Men Juon, Niculin Zonder, Felice Defilla, Plasch B. Lansel, Chasper Sarott, Conrad Benderer, Domenic Lansel.

Dürant la guerra s'haja stuvü eleger ün suppleant dal president, uschea dal 1940 fin dal 1942 a Fritz Staudenmann chi faiva qua da cuafför!

Dal 1946 fin dal 1960 cumparan ils seguaints noms sco commembers da la suprastanza:

Chasper Werro, Tinet Werro, Peder Benderer, Peder à Porta, Duri Salomon, Peder Pua, Chasper Valentin, Jachen Pult, Jachen Fried, Jachen Buchli, Claudio Vital e Jon Gianom.

Dal 1960 fin dal 1976 sper ils presidents:

Peder Buchli, Otto Augustin, Jachen Egler, Richard Seeli, Not Horber, Jon Conradin, Nicolò Roner, Reto Mösle, Otto Valentin.

Dal 1976 fin dal 1986:

Jachen Stricker, Madlaina Stupan (prüma duonna!), Cla Valentin, Not Buchli, Cla Pult, Peder Clalüna, Cla Sarott, Dumeng Jann, Reto Buchli, Andri Lansel, Andri Guler e Mario Rico Gianom.

Dal 1986 fin dal 1995:

Karl Hauser, Andri Gritti, Emil Arquint, Duri Vital, Chasper Planta, Linetta Krebs-Valentin, Fadri Stricker, Domenic Bass, Jöri Felix, Alexander Hauser, Andri Poo.

6. *Per preparar quista sairada, ho ho ho
vain dat 'na gronda lavurada, ho ho ho
vain dumandà bod a minchün
sch'el savess alch dad amo ün.
Che cha gnü oura lura ais
in paca pezza fain palais.*

Ref: Culs skis sun its ...

Chasper Buchli, 1910

El es il plü vegl chi'd es gravà il nom aint in ün bacher chi's rechatta aint illa chaista da nos club. I's tratta dal bacher da la stafetta da Scuol. Quai d'eira amo avant il 1930, Sent vaiva annunzchà duos gruppas:

Sent I cul nom Soèr (Peder Benderer, Conrad Benderer, Peder Vital, Jon Bazzell)
Sent II cun nom Sinestra (Talin Pua, Chasper Buchli, Plasch Bardot Linsel, Jon Schnegg).

Il traget manaiva da Scuol giò pro Waser/Rizzi fin oura Talur, ingio cha Talin Pua es rivà sco prüm; da Talur süls Cunfins ed oura Chauennas, quella stantusa muntada d'eira la part da Chasper Buchli chi vaiva trenà jadas e jadas dal Stradun sü da Tschesch fin sün Avant Baselgia. Süls skis vaiva'l dat sü Dunsinger-Wachs - alch tuot special per quel temp - in ün zic-zac sülla soula dals skis e struschà oura be pakin. Sü Chauennas è'l rivà plü co 5 minuts avant il seguond. Da Chauennas sur Pedras e Puors fin Pazòs d'eira il traget da Plasch da Bardot, e quel toc chi giaiva aval d'eira il toc predestinà per Jon Schnegg. Al böt d'eiran Men Rauch, vegl redacter dal Fögl Ladin, e Hermann Frei sco tempaders. Tinet Werro s'algorda amo cha Men Rauch vaiva dit: „Jon, tü est gnü uschè svelto, uossa nun hast plü nom Jon Schnecka!“

Burtel Bezzola

El es stat magister a Sent al principi dals ons trenta. El am scriva:

La megltra documentaziun sarà bain quella da la prüma minada sü pro'l Cuvel da l'Iva, 1933. Preschaints d'eiran eu, teis bun bap barmör, meis char collega Chasper, Michel Bazzell ed üna guardgia da cunfin, eu pens Richard Bubi Valentin, e Jachen Buchli sco minör.

Il club da Sent d'eira quella jada fich activ, na per cuorsas, ma per far turas numerusas dadaint e dadour munts.

Da las muntadas cun pels sün nossa pizza am sun restadas plü bellas regordanzas co da las schussadas aval.

Hoz am lasch però eir eu be trar fin süsom sco ün grond pultron.

As giavüschi buna reuschida e bellas algordanzas.

Burtel Bezzola
Cun amicals salüds

Christian Clot Schmidt, 1912

Imprais ad ir culs skis ha'l dal Chant da Sala giò, ma nò cun skis, cun assas da butschin! Dal 1919 vaiva seis vaschin, Carlo Zanotta, dit cha quai sapcha'l eir el, ma i esa mal, giò aint pel bügl, ün „Purzelbaum“ e mol cha'l d'eira!

Ün on vaiva el fat 25 turas e speraiva sül plat, ma Richard Margadant vaiva fat üna daplü!

Ed amo alch: ca. dal 1937 ha Christian C. Schmidt fat cun meis bap la tura Sent – Tasna – Fluchthorn. Cun ir sü vers il Piz dal Fluchthorn vain tuot in üna jada ün a cupichas suringì. I til han pudü fermar sü, i d'eira ün Tudais-ch. Davo ün pezza vain la duonna dal Tudais-ch da casü giò planet. Fingì sün ün toc ha'la clomà: „Lebt er noch?“ Els han dat dal cheu. Culs skis dal Tudais-ch e cullas pels hana fat ün „canadier“ e til han strat fin giò la „Heidel“, là ha la Tudais-cha pajà ün giantar e Christian e Chasper sun its sur Chöglias oura Sent. Tuot in ün di! La saira füssa stat amo bal maschrà al Rezia, ma là nu suna its.

Plasch da Bardot Lansel, 1912

Plü bod nu vaivan nom las cuorsas grondas SEB, quai d'eiran las cuorsas d'Engiadina Bassa. La prüma d'eira statta ad Ardez dal 1928, la segunda a Sent, dal Cuvel da Carlin fin in Saranschasch, la terza our da Tuoi fin giò Lavin. Sent vaiva guadagnà las duos prümas jadas, sü Lavin hana lura pers il bacher. Illa gruppa d'eiran Jachen Muos-cha, Michel Bazzell, il pittur, e plü co facil amo ün.

Plasch s'algorda eir amo da la prüma tura Sent – Sur En – Uina – Sesvenna, lura hana stuvü tuornar pervi chi d'eira gnü sü trid!

Eir Lina Vital-Muos-cha es statta da giuvna cun seis bap aint dad Uina, sül Schadler ed our in S-charl!

Festa Lansel, 1913

El nu vaiva tanta simpatia pels skis sco seis frar Plasch, ma a far sü il Cuvel da l'iva, chi'd es gnü inaugurà dal 1935, ha'l güdà cun seis chavà e la charücla a far ils transports da la legna da construcziun e da las assas. Da vitürins han fat eir Peder Vital, Chasper Buchli, Jachen Muos-cha e Christian Clot Schmidt. I giaiva cul chavà e charücla fin sü sur Taslaina e da là inavant esa lura gnü portà!

Flurin Bischoff, 1920

Las cuorsas da l'SEB ha el fat adüna per Ftan.

Ün sistem per masürar il temp sainz'ura, chi nu'm d'eira cuntschaint, n'haja imprais a cugnuoscher da Flurin Bischoff.

Dal 1948 ha Flurin Bischoff tut part la dumengia a bunura sü Schlivera ad ün uschedit cuors da „Ski- und Turnberater“ e la davomezdi – el nu vaiva gnanca s'annunzchà s vess, ma i vaivan trat oura ils numbers – a la cuorsa aval da la skiada Sent-Landeck sü Flüs. Cul ultim numer – Steiner da Landeck gniva fingià tut süllas spadlas sco vendschader – es gnü giò eir Flurin e battü a tuots. Amo ün interessant detagl: I d'eira quel di eir gnü fat ün'ingiavinera. La dumonda: il temp dal vendschader. Mario Vital vaiva ingiavinà precis.

Tinet Werro, 1920

Tinet nun es be veteran da nos club, Tinet es eir commember d'onur da nos club. El sarà l'unic chi ha fat tuot las plaivs: president, actuar, chaschier, revisur, tempader ed organisatur dal giubileum „50 ons CSS“.

Ün'anecdota tuot speciala cha Tinet as algorda fich bain: A las reuniuns dal club gniva bler discurrü da la bindung, da las cantas, dal wax, da la rilla; bod d'eira la naiv spitza e bod stumpf, chi vaiva ün krampf ed uschè inavant. Jachen Zisler s'ha adüna dat fadia da muossar ils drets terms s-chet rumantschs, uschè eir dal 1954, ün on cun blera naiv, d'ürant üna radunanza sü „Jägerstübli“ dal Schigliana. Suot varia esa gnü decis dad ir cul club sü Bativ e güdar a Nical e Michel a far senda per gnir giò culs süts. Richard Margadant ha lura dit: „Guot, drauf, sü i jò cul plunder!“

Flurin Denoth, 1920

Sent, 16. Jan. 1995

ERINNERUNGEN (für Präs. Cla Sarott)

1. Wie ich Präsident des CSS wurde

Im Spätherbst 1944 wohnte ich mit meiner Familie (Frau und Viktor) in Sent und führte zusammen mit meinen Eltern das Hotel Rezia. Daneben hatte ich noch einige Ämter, u. a. Gemeindegassier. Das Motto aber lautete: einen Monat daheim, einen Monat an der Grenze ... Mit dem CSS hatte ich wenig Kontakt. Einige Rennen des SEB sahen auch mich: in Ramosch beteiligte ich mich an der Abfahrt mit Start in Alp Ischolas, in Ardez ebenfalls an einem solchen Anlass (oder Guarda?).

Eines Abends, so gegen Mitternacht, ich war bereits im Bett, kam ein Familienangehöriger zu mir und eröffnete folgende Neuigkeit: Unten ist einer vom Skiclub Sent und berichtet, man habe dich zum Präsidenten gewählt ... Ob ich sofort zugesagt habe oder „das Amt“ stillschweigend angenommen, weiss ich nicht mehr. Jedenfalls organisierte ich ein Jahr später die 25jährige Gründungsfeier des Clubs.

Zuoberst auf dem Tätigkeitsprogramm standen damals immer die Skitouren. Von einigen berichte ich nachfolgend.

2. Skitour Sent-Cuvel da l'Iva, Fuorcla Soèr, Laver, Zuort, Sent

Von der Fuorcla Soèr aus fuhren wir in stiebendem Schnee Richtung Laver. Im

Talboden unten, dem zugeschnittenen Bach entlang! Plötzlich, bums, und Flurin Denoth war samt Ski im Bach, knietief im Wasser. Mit Mühe zog mich Albert Werro heraus. Alleine hätte ich Mühe gehabt, das Leben des jungen Familienvaters zu retten...

In Zuort hatte ich Gelegenheit, zu retablieren. Auch von Innen heraus!

Auf dem Foto erkennt man u.a. ganz links: Otto Juon, Hanin Koch, dann Michel Stupan, Mazina Bardola (-Tönjachen), Niculin Stupan ... und FD. Hinten: Jachen Zisler, mag. Sarott u.a.

3. Skitour Sent-Tuoi, Fuorcla Vermunt, Wiesbadnerhütte, Ochsencharte, Jamtalhütte, Galtür, Landeck, Sent (1945 oder 1946?)

Übernachtet wurde am ersten Tag in der Tuoihütte. Dabei war auch der gute Skifahrer und Schüler Andrea Janom. Seine Eltern wollten ihn nicht mitkommen lassen. Ein Verwandter von ihm, Richard Margadant, übernahm persönlich die Verantwortung für die körperliche und seelische Unversehrtheit des Jungen. In der Jamtalhütte angekommen (es war für einige Ältere sehr hart, von der Tuoihütte herauf und herabzusteigen) löschten wir zuerst den Durst. Dann kam der Entschluss: Wir, FD, Andrea Janom und noch zwei jüngere Skifahrer bilden einen Vortrupp und ziehen sofort nach Galtür. Dort angekommen, mussten wir stundenlang warten; vor Langweile geplagt fassten wir den Entschluss: Wenn die andern ankommen, müssen sie zuerst tief, tief atmen und sich von einem Schock erholen. Tatsächlich: der „Schock“ hätte in die Hosen gehen können! Verbandsmaterial hatten wir selbstverständlich bei uns. So banden wir den Kopf von Andrea Janom mittels Schildkrötenverband dermassen professionell ein, dass man kaum seine Augen sah. Von anwesenden Damen und Skihäschen bekamen wir rote Lippenstifte, um Blutspuren zu markieren. Dann lag Andrea „kunstgerecht“ auf einer Bahre. Ziemlich lange ... bis das Gros des CSS ankam, mit Richard Margadant an der Spitze. „Spass, Spass“ mussten wir wiederholt rufen, aus Angst, Richard treffe der Schlag. Ernüchert fuhren wir dann mit einem Camion nach Landeck, wo wir mit dem dortigen Skiklub zusammenkamen und den Abend verbrachten.

Das war bestimmt im Frühjahr 1946, denn im Hotel Sonne in Landeck, wo wir den Abend verbrachten, waren Jungs, kriegsefahrene (Franzosen) Soldaten, die einfach als Besatzungstruppen nachgeschoben wurden. Dabei wussten wir ihre Heldentaten zu würdigen!

4. 1947 (Ich war bereits beim Kanton angestellt und wohnte in Chur) beteiligte ich mich an einer Clubtour an Ostern (oder Pfingsten?). Wir stiegen über Fuorcla Laver ins Val Fenga und nahmen Quartier in der „Heidelbergerhütte“, von wo aus wir einige Tagestouren unternahmen. Am letzten Tag hiess es, zusammenpacken und über den Beg nach Hause ziehen.

Mit dabei war auch Jürg Moggi, so quasi wie ich als „Gast“. „Was wemmer, was wemmer“, sagte Jürg zu mir, respektive umgekehrt, „wemmer nit no a paar Tag do bliba?“ Abgemacht!

Das Gros vom Club marschierte – ohne uns zwei, aber mit entsprechender Meldung – nach Sent. An Clubmitglieder erinnere ich mich nur noch an Men Lansel. Nach einigen Tagen entschlossen wir – Jürg und ich – nach Hause zu ziehen. Es war ein nebliger Tag, föhnig und unangenehm. Einige hundert Meter stiegen wir Richtung Fuorcla Laver. Uns wurde immer mulmiger, es roch nach Lawinen, wir sahen keine zehn Meter weit und entschlossen uns, in die „Heidelberger“ zurückzukehren. Von dort aus fuhren und marschierten wir

zusammen mit Aloys (nachmaliger Hotelier in Ischgl, Hotel Madlain, und „König“ der internationalen Skiarena Ischgl/Samnaun), welcher in der „Heidelberger“ irgendwie tätig war, nach Ischgl und dann mit der Post über Landeck heim nach Sent.

Es waren alles herrliche Berg- und Skierlebnisse, welche ich nicht vergessen kann!

Flurin Denoth

Jachen Zsler, 1920

Als 9 schner dal 1941 es Jachen gnü tut sü sco commember da nos club. Dal 1953 es stat a Sent l'SEB. Jachen Zisler d'eira responsabel per la pista e'ls guardgiaportas. El ha gnü da trar ün greiva decisiun: Ün dals megl ders da la Svizra pel slalom da quel temp, Mario Reinalter da Brail, es i sper la porta via ed ha stü gnir disqualifichà. Tuot logic e correct e güst, ma greiv tanter laic e profi! Jachen Zisler ha fat pel 25avel e pel 50avel anniversari da nos club üna salamuaira chi po gnir letta davo aint ils cudeschs d'or. L'ultim versin cha Jachen Zisler vaiva fat dal 1970 tuna seguaintamaing:

*Ed uossa chars skiunzs,
stuorns o gegüns,
saduols o flinchs
cha sajat be da Sent
gnü sü da Scuol
o aint da Cuoira,
per l'on 1995,
tscherchai ün oter hom
chi's mett'in salamuaira!*

Jachen Zisler

Nical Stupan, 1921

Nical ha eir fat fich bler per nos club ed es eir gnü onurà sco commember d'onur! El ans quintarà lura davo svesse sur da sias algordanzas.

Uossa cumainza fingià la segunda generaziun da nos club!

Chasper Valentin, 1923

Figl da Cla Valentin, stat fundatur dal club.

Chasper ha fat l'actuar e capogitas sco plaivs da nos club. Blers ons d'eira el il starter, il partiröl, per las cuorsas da l'SEB. Eir eu m'algorde amo da sia ura, üna marca „Eterna“, sco quella da meis bap, però raduonda! L'ura gniva tgnüda sainza

manetschas aint il man schnester, il man dret vaiva da tgnair la spadla dal curridur. Ün on sü Buffalora d'eira seis man schnester bod dschet giò! Quels scelerats fervents curridurs sco Linard Quadroni e Not Tschander provaivan adüna da partir plü bod, i sun lura gnüts chastiat cun 10 secundas. Davo esa lura stat pos!

Reto Luppi, 1923

Pac davo esser rivà a Sent sco magister ha eir el fat part a nos club ed a la cuorsa da Landeck. Pro la cuorsa aval è'l i fich „drauf“, ha tschüf oura a Rico Janom, però be cuort avant il böt, cun ir giò d'ün röven, ha'l cruschà ils skis davantvart e ruot la chomma dretta suot il schnuogl. Davo chi d'eira gnü giò Flurin Bischoff sco ultim es i eir Otto Schmidt davo be „schwung“, fat üna pazlada e ruot chomma; i d'eira ün di chod cun naiv da prümavaira. A l'ospidal a Scuol d'eiran Reto Luppi, il magister, e seis scolar, Otto Schmidt, aint ill'istessa stanza. Andrea Werro ha tut a Reto Luppi sülla goba e portà giò'n cumün. Pür la saira es gnü clomà il docter Bazzell chi ha lura constatà la ruottadüra. Otto Schmidt vaiva üna chi cuccaiva oura l'ossa.

Jacob Lansel, 1924

Figl da Domenic Lansel, stat fundatur dal club.

Jacob es stat da giuven bler davent, el gniva però in nos cumün per far plü bleras cuorsas pussiblas. Quai vezzaivat eir aint ils bachers chi sun qua per sala intuorn.

Fich jent s'algorda Jacob da la cuorsa cumünaivla culs da Landeck dal 1952: Seguond aint illa cuorsa aval e seguond aint il slalom, quai chi ha lura dat il prüm rang da la cumbinaziun!

Barnabà Casura, 1925

Fingjà da giuven es el i davent ed uschè nun ha'l pudü far plaivs pel club da Sent. Ma per las cuorsas gniva el adüna, scha mez e pussibel, sur dumengia a Sent. Quels chi s'algordan ün zich, san cha Barnabà vaiva lura ün stil tuot special, elegant e svelto. Eir Andrea Janom va in quella categoria, quel faiva bod be sots impè da stortas.

Cur cha Barnabà d'eira in 8avla classa es ida la scoul'ota cumpletta in Fenga, duos dis. La saira sun alch mats its giò'n schler ed han bavü alch our da las damigianas. Il di davo d'eirna lura ter bambo; il magister varà gnü badà alch, Beck tils ha fat portar eir las buschas da las mattas, uschè chi vaivan ün „Rucksack“ davant ed ün davo!

Eduard Bass, 1925

Figl dad Emil Bass, silvicultur, stat fundatur da nos club.

Eduard faiva fich jent turas grondas illa stupenda cuntrada dal Silvretta, ma el ha eir tut part a cuorsas, per exaimpel cuort davo la guerra mundiala a la cuorsa R. N. Ri – Naluns. Quella vaiva lö pel solit al Firà da Pasqua. Davo la cuorsa suna its giò Ftan a far amo la festina. Davo il „Ski Heil“ ha Nino Bibbia surtut cun sia camionetta averta il transport pels skiunzs da Scuol e da Sent, bod üna vainchina cun skis e bastuns, chi in sezzas, chi in pè, s’ha schmachà sülla „Bruck“ davo sü. I esa pac toc, be suot la stradella, pro la prüma storta chi volva vers Ardez esa stat finì cullas „bremsas“, il lastin es rivà sur via oura, giò’l prà, mez cupichà: resultat: 10 tocs a l’ospidal, Eduard cun ruot ün polsch dal man ed ün pèr costas. Nino Enderlin cun sias sours Ortensia e Clärlì e meis bap sun restats salvì!

Richard Gartmann, 1935

1967 – 1970: 4 ons president

1977 – 1982: 6 ons president

Cur cha Richard ha surtut il president d’eira la cassa vöda, binderas ingünas Il prüm es gnü fatta üna raziun da collers.

Davo ha’l fat ir a sia duonna Seraina pel cumün intuorn a ramassar raps: Id es gnü aint vaira bler, la glieud es statta generusa.

Richard es i bler a cuorsas cullas giuvnas Aita Stupan, Corina Stupan, Ursina Linsel, Sonja Gartmann.
Be femnas, sco a Wels im Tirol.

Il bacherin da la stafetta d’eira rivà pro Jacob Benderer aint il flus....

Bleras cumedgias pervia dals temps davo las cuorsas...

Las festas sun stattas bellas, ün jada gnü ün pa difficultats cun gnir sü da Sur En, la not a las trais, davo chi vaiva naivü, sülla Storta dal Cuc, cun metter sü chadainas.

Oter nu sa’l plü, i’s vain vegl ...!

*7. Per s’orientar sur da l’istorgia, ho ho ho
as poja ir giò la Chavorgia, ho ho ho
o leger tras ils protocols
Bod tuotta not ils ögls sun mols
e quintar sü tuot part per part
tadlai qui chi sta scit suotvart*

Ref. Culs skis sun its ...

Protocols

Displaschaivelmaing nu vaina chattà ils protocols dals ons 1920 fin dal 1930, i nu sun plü avantman!

Da quel temp varana gnü fat bod be turas, mo da quellas lura bleras!

- Statuts dal 1930: be commembers activs, almain 5 commembers per exister.
- Dal 1930 es stat il prüm SEB; Hermann Frei d'eira president, Otto Roner actuar. I daiva 4 classas da rangaziun:
 1. Berufsfahrer (Skilehrer, Bergführer, Grenzwächter)
 2. Juniors suot 20 ons
 3. Seniors I. fin 32 ons
 4. Seniors II. sur 32 ons.Delegià 2 marz 1930 SEB: Georg Küng
- Prüma delegiada SEB. Johann Tschalär e Cla Valentin
- 7 schner 1931 es gnüda fatta üna cuorsa Flüs - Plattuoiras - Plan Mus-chan - Bügliöl - Via Sura
- Dal 1931 ha dat il club skiunzs a la società da musica 30 francs per üna bindera
- 19 schner 1932 esa gnü decis da far üna cuorsa dal club e per la scoula, e quai subit chi vain la naiv
Id es gnü discutà da far üna stafetta cun jouslas, schlitras e skis cun trais participants per roda, traget: Taslaina – Sent – Crusch
- Als 10 december 1932 ha il club tut sü duos commembers novs: ils magisters Burtel Bezzola e Chasper Sarott
- Dal 1933 esa gnü tut fos il temp a l'SEB e quai dal slalom, lura hana fat la dumengia davo amo üna jada il slalom
- Als 5 marz 1933 ha gnü lö la cuorsa dal club dal Cuvel da l'Iva fin Niruns
- Als 2 december 1932 esa gnü decis da tour sü eir duonnas aint il club
- 1934 vaivna discurrü sur dal transport dad assas per la chamonna dal Cuvel da l'Iva
- Als 24 schner 1934 esa gnü fat commembers activs e passivs
- Als 13 schner 1935 - il CSS vaiva 15 ons - es stat a Sent l'SEB
- Als 8 november 1934 decida il club dad esser perinclet da tour part a la cuorsa Soèr – Zuort organisada da Mengelberg e Clot Curdin
- 28 faver 1935 vain elet Cla Valentin sco prüm capogita
- Dal 1937 es Georg Küng president da l'SEB; delegiats sun Cla Valentin e Jachen Buchli
- Dal 1937 vaina decis da far novs segns dal club cun sü il Soèr davovart e na be x üna muntogna! La cuorsa dal club va dal Cuvel da l'Iva fin Saranschasch
- In schner 1938 vaina decis da far üna cuorsa per trenamaint da slalom avant l'SEB

- 22 december 1940: Silvicultur Emil Bass as declera pront da megliorar il trassè da Darsüra – Vastur e da far tagliar plantas necessarias, quai chi sta in sia cumpetenzza
- Als 9 schner 1941 vegnan tuts sü Jachen Zisler, magister, e Fritz Staudenmann, cuafför
- Al listess di regala sar Victor Denoth ün bacher chi dess saimper restar in possess dal club ed esser deponà pro'l donatur. Il bacher vain dat oura per la cumbinaziun
- Sar Peder Fried survain ün büman da 5 francs, quai sarà stat per bannir las radunanzas chi vaivan lö quella jada bod ün jada al mais
- Als 30 october 1941 vaina decis da prolungar l'uscheditta Chalet-Pista fin Niruns o Bativ
- Als 22 december 1941 hana tut sü a Nical sco commember. A l'SEB pon tour part be quels chi piglian part eir activmaing als trenamaints; i gniva quella jada pajà il viadi, il mangiar e la sgüranza dal di!
- Suot varia as po leger: Sperain cha duonn'Ola squassa bainbod ils plümers; als 26 december haja lura naivü ed eu n'ha let aint il diari da meis bap ch'eu d'eira para tuot stut da la naiv
- Als 17 marz 1942 decidna da dar eir als turists raps vi da las spaisas per la tura Zernez – Süsom Givè – S-charl, sco a quels chi van a l'SEB
- Dal 1942 es l'SEB a Sent
- Dal 1943 - i d'eira d'ürant la guerra - vain fat la gara be pel bacher, ingüns oters premis
- Als 7 favrer 1943 vain fat ün bal dal club. Conrad Benderer e Fritz Staudenmann vegnan elets sco „Tanzmeisters“ e pon arrandschar la sairada sco chi vöglian
- A partir dals 16 marz 1943 nu ston ils commembers da la suprastanza plü pajar la contribuziun annuala
- Als 10 favrer 1944 vain tut sü Flurin Denoth sco commember
- Als 11 december 1944 vain proponü da meis bap barmör ün plat o premis pels prüms 5 da las turas; i vain eir cumanzà cul cudesch d'or
- Als 5 decmber 1945 vegnan tuttas sü sco prümas damas Madlaina Stupan, Ida Werro ed Ida Denoth-Schlappbach; tanter quist trio feminin d'eira sco giuvnot Duri Salomon. I vain eir decis da festagiar ils 25 ons dal club e dad invidar a tuot la populaziun da Sent
- Il comitè survain 200 francs per spaisas. I vain decis da nomnar als fondaturs sco commembers d'onur

- Sco ustaria da „Stammlokal“ per la radunanza generala vain clet oura l’ustaria Engiadina. Sar Richard Margadant propuona da trar aint offertas per uras precisas
- I nascha eir la chanzun dal club. Aint illa gazetta annuala dal SSV dal 1937 d’eira aint l’esit d’üna concorrenza per chanzuns sur dal sport da skis. Aint i’l seguond rang d’eira la chanzun da la scoula da skis dad Arosa. Quella melodia vaiva intimà a meis bap da far vers rumantschs per Sent
- Als 23 november 1946 vain cumanzà la radunanza culla chanzun dal club. Dürant il prüm act da la radunanza vaina decis da giovar il teater: „Il tradimaint da Novarra“ insembel culla società da gimnastica; il 2. act ha tenor protocol dürà fin ad uras pitschnas
- Als 21 december 1946 vaina decis dad indorar las placcas dals commembers d’onur. Il schef da turas es in dovair da portar l’apoteca ed il piz da reserva!
- Als 12 schner 1947 vöglina far a minchün chi’d es 25 ons aint il club sco commember d’onur
- Als 29 december 1947 vain cumprà ün uschedit „Rettungsschlitten“, plü co facil alch per metter insembel, perche ils cuosts d’eiran be da 21 francs.
- Dal 1947 vain fatta la cuorsa dal club da Telf fin Flüs
- Als 21 schner 1948 vaina constatà cha’l Cuvel da l’Iva va in decadenza. Aint illa cumischiun per refar vegnan elets Georg Küng, Jachen Fried, Jachen Buchli e Plasch B. Lansel
- In november dal 1948 propuona Richard Margadant da far üna cuorsa d’amicizcha culs da Landeck. Aint il comitè vegnan per quella roba: l’iniziant, implü Georg Küng e Chasper Werro
- Tenor protocol vain tut sü Chasper Valentin dal 1949 sco commember
- In december dal 1949 vain l’iniziativa per üna cuorsa regionala Sent – Landeck – Reschen ed i nascha eir l’idea per ün uschedit „Sie und Er“
- Pel 1951 ceda Sent l’SEB als da Zernez. Nical surpiglia - davo blers ons cha Michel vaiva fat il president - quella plaiv
- Sco nouva plaiv daja ün organisatur: elet vain Tinet Werro
- I decidan eir da dir da na a la cuorsa Sent – Landeck – Reschen e da comprar nouvs numers da taila e sün giavüsch dal cussagl da scoula da na far la cuorsa pels scolars. Quai d’eira als 4 schner 1951, avant chi gnissan las naiveras
- Causa las naiveras, las lavinas cun greivs accidaints a Zernez, nu po Zernez far l’SEB. Sent stess surtour da nouv, ma nu voul. Scuol ha lura manà tras l’SEB

- Sün dumonda dal capo Johann Faller decida il club dad ir als 7 marz a Zernez a güdar a tscherchar las victimas da la lavina da l'Ova dal Sagl
- In marz dal 1951 regala Conrad Benderer ün bacher pel „Riesen“ previs dal Cuvel da l'Iva fin Niruns. Rangaziun al Fontana obligatoric, però exclusiv il bal
- Als 29 marz vegnan invidats eir ils da Danuder e dad Ischgl pel „Riesen“ dals 8 avrigl chi vain manà tras giò Mariers
- Il plat da turas dà adüna darcheu andamaint a discussiuns, tanter oter vain üna jada decis da scriver aint be ils noms da quels chi tuornan eir cul capogita
- I nascha als 26 november 1951 l'idea da far a Sent ün corp da salvamaint e comprar ün canadier
- Richard Margadant dà ün pêr skis per metter insembel ün canadier
- Als 22 schner 1952, ün on davo las naiveras, nu d'eira amo gnüda naiv avuonda per far la cuorsa dal club
- Als 3 marz 1952 sto mincha commember gnir cun duos collers sco bastuns da binderas
- Quel on d'eira Plasch Bardot Lancel president
- Als 16 november 1952 ha pudü gnir fatta la prüma tura sün Telf per verer il nouv traiget da la cuorsa aval Telf – Saranschasch SEB
- Pel prossem inviern es il club pront da far la cuorsa dals scolars, però be scha'l cussagl da scoula dà l'acconsentimaint
- SEB 1953 a Sent
- Las bannidas dal club van da quinder inavant tras scolars ed il club dà 10 francs per la chascha da viadi
- Il canadier vain deponà sü Mot San Peder
- Linard Quadroni vain commember
- Dal 1954 davent vegnan ils protocols scrits cun culi
- Dal 1954 vaina eir discutà per laschar far als mats gronds las cuorsas dal club
- Eir dal 1954 esa da far reparaturas vi dal Cuvel da l'Iva
- Quel on saraja stat blera naiv, il club güda a Nical e Michel a tour il muvel giò da Bativ
- Il club prouva da nouv cul cumün per metter sü ün gruppa da salvamaint per tuot on

- Dal 1955 daja per la prüma jada medaglias a la cuorsa dal club ed i vegnan dats 100.– frs. a la musica per novas unifuormas
- Als 14 schner 1957 nu vain amo miss sü il program da turas, causa chi nu d'eira ingüna naiv
- A la fin da favrer decidna da far la cuorsa subit cha la naiv permetta
- Dal 1957 nun es la gruppa da salvamaint amo in chomma
- Als 16 marz 1957 vaina decis da far üna classa dapersai per giuvnas chi vöglian far la gara dal club
- Il material es in nosch stadi. Als 15 november 1957 vain elet Claudio Vital sco prüm schef da material
- Dal 1958 fa Erica Valentin la proposta per far ün cuorsa Ella + El. Il program es il seguaint: avantmezdi slalom, davomezdi cuorsa aval e lura amo Ella + El
- Als 16 december 1958 vaina decis da chastiar a quels chi nun han sü la medaglina dal club per la radunanza
- Dal 1958 es l'SEB darcheu a Sent; i decidan da cumprar dal cumün ün legn da resgia da petiziun per tagliar oura roncals per las portas
- Ün di avant Silvester dal 1960 vegnan onurats sco commembers d'onur Tinet Werro, Jon e Cla Conradin
- Otto Augustin dvainta lura dal 1961 actuar dal club. Als 29 december 1961 nu po amo gnir decis pervi da cuorsas, causa mancanza da naiv
- Als 21 avrigl 1962 daja üna radunanza extraordinaria per trattar pervi da la „Skilift Sent AG“. I vain decis da cumprar ün'aczia da 500.– frs.
- Sco cusgliaders pel traget dal lift e las pistas vegnan delegiats Tinet Werro, Jachen Egler, Jacob Benderer e Peder Buchli
- Dürant la stà füssa da far ün tir a chejels
- Dal 1962 daja novs statuts e l'entrada i'l BSV e l'SSV
- Eir dal 1963 fana ir als giuvens a cleger bastuns per portas
- Als 27 december 1963 fa maschel Lüzza Stalvies in nom da la Skilift Sent AG la dumonda al club per metter sü la coluonna da salvamaint. Per far pista sü pro'l lift daja bigliets gratuits per amunt
- 29 december 1964, avant 30 ons: i nu dà quel inviern ne cuorsa dal club ne SEB causa la naiv chi manca
- Il lift da Sent es fabbrichà; i cumainza plü ferm il turissem d'inviern. 1965 fa il club üna cuorsa pels giasts

- A la radunanza dal club dal 1965 vain tut sü ün da Vnà aint il club, ma el nu dascha tour part a la cuorsa dal club. I's trattaiva qua da Nino Casura
- Ün on plü tard, als 26 november vain Richard Gartmann nouv president
- In december decidna darcheu dad ir a tschunker bastuns per binderas
- Dal 1967 regala il cuntschaint velocipedist Ferdi Kübler ün bacher
- Dal 1968 guadogna Jachen Egler il plat da turas per adüna
- Als 5 december 1969 vain elet Tinet Werro sco organisatur per la festa „50 ons Club Skiunzs Sent“
- Il bacher Kübler vain dat oura sco ün pitschen „Weltcup“ da l'Engiadina Bassa; Johann Otto Taverna es il prüm vendschader dal club da Sent
- Dal 1970 vain la naiv massa tard, i nu dà cuorsas a Sent
- Als 11 avrigl 1970 vain festagià al Rezia il giubileum da 50 ons
- Kübler 1970: Georg Pua
- Kübler 1971: Andri Guler
- Eir dal 1971 less il Trio Eugster laschar vender plattas tras il club ed il guadagn gess al club da Sent
- E darcheu: „Causa mancanza da naiv nu pudettan gnir fattas ingünas cuorsas“, ma sco gronda surpraisa vin protocollà l'appariziun our dal s-chür dal cudesch d'or! Sün quai vaina decis da metter actas importantas giò l'archiv cumünal, e quai cun 24 : 2 vuschs
- Eir dal protocol dals 16 december 1972 as poja leger chi nu sun gnüdas fattas ingünas cuorsas
- Duri Vital ed Ursina Linsel han tut part a la cuorsa grischuna da giuventüna e sport
- Per la stagiun 1972/73 vain decis da far ün stafetta populara cun schlitra, passlung e slalom gigantesc
- La stagiun 1972/73 nu sun gnüdas fattas ingünas turas causa mancanza da la sgürezza dals partecipants
- 1973: Kübler a Hanin Conradin
- i vain constatà cha la chamonna dal Cuvel da l'Iva saja in nosch stadi. I vain decis da cumprar ün'ura da stop. I vain dat l'import da 200 francs per la lottaria da la chasa da scoula nouva, quia a Saranschasch
- 3 december 1974: La Skilift Sent AG less vender il lift al club

- Artur Fried es pront da far be pel predschi dal material üna s-chaffa plü gronda pels bachers
- Cla Valentin vain elet sco trenader da la „Rennguppe“
- Kübler: ad Aita Stupan
- Aint il protocol dals 20 december 1975 as poja leger chi nu sün gnüdas fattas ingünas turas causa chi vöul la patenta da guida da muntogna per manar üna tura
- 1976: il lift nu va plü
- Causa assenza da Cla Valentin surpiglia Richard Gartmann la funcziun sco trenader
- Dal 1975 sun statts pacas cuorsas causa paca naiv
- Als 10 december 1976 vain eletta Madlaina Stupan sco prüma dama aint il comitè
- Dal 1977 vain dumandà a las PSFS schi fessan la pista pel club cul ratrac
- 1977 Kübler per Sonja Gartmann
- 1978 prüm passlung Martina – Scuol cun partecipaziun dal club da Sent
- als 23 december 1978 decida la radunanza da sortir da l'SSV
- Richard Gartmann es pront da far inavant il president, però be sch'inchün oter fa la roba dal passlung Scuol – Martina, causa ch'el es allergic sül passlung

8. *Commembers da nos Club han gnü, ho ho ho
ideas cha tuots han sustgnü, ho ho ho
cul sport as poja motivar
da nö adün'in stüva star
da tour a mamm'e la janüra
ed ir giodair nossa natüra*

Ref: Culs skis sun its ...

SEB

Uschè als 3 marz 1930 s'han radunats a Lavin – davo üna bella tura sur Grialetsch e Piz Sarsura - ils delegiats dals clubs da Zernez, Ftan, Scuol, Lavin e Sent a la radunanza da fundaziun da la secziun da skis d'Engiadina Bassa.

Preche güsta a Lavin? Sül'iniziativa dad ün fundatur e stat commember da nos club, Mario Giacometti.

L'idea da l'SEB es üna part da Sent, delegià d'eira stat quel di Georg Küng.

L'SEB ha dat als skiunzs da l'Engiadina Bassa bleras fich bellas regordanzas. Las garas da skis han cumanzà ad esser „in“, eir in nossa regiun. La culminaziun ha cumanzà davo la guerra mundiala e s'ha tgnüda fin aint pels ons 60. Lifts e ratracs, ingün nu vaiva plü vögliä da muntar cun pels e far pista, licenzas e chaplina ed otras robas han lura laschè ir inavo l'interess. Co chi sta hoz as sarà cuntschaint!

Super-G Champatsch

Avant bundant 10 ons, cun discutir aint il Rezia sur da la legenda Jachen Muos-cha chi gniva da Präschensch giò Surains be „Schuss“ tras la naiv lomma sainza pista - quai d'eira la cuorsa Soèr – Sent – sün mia remarcha da provar üna jada üna cumbinaziun be cun ün start: Cuorsa aval, lura ün toc „Riesen“ e per finir giò Saranschasch ün slalom, tuot in üna e na stair far oura cun puncts da la tabella Milo il vendschader, es nada süll'iniziativa da nos president da quella jada, Reto Buchli, ils Super-Gigantesc Champatsch. Pels 13 december 1984 ha lura Reto Mösle invidà aint a commembers dal club da Scuol e da Sent al Collina a Scuol a la prüma sezzüda da coordinaziun.

Be l'on passà vaina pudü festagiar il giubileum da 10 ons. Davo il discapit dal 7avel cun helicopters e titels gross per las gazettas intuorn es quist evenimaint avanzà ad üna cuorsa gronda populara per minchün, cun character internaziunal e buna reputaziun. Mez il cumün as metta a disposiziun per üna o tschella plaiv. Cumün, musica e cornins ans sustegnan. Ün bel fat!

Traversada

Pac davo il prüm Super-G es gnüda iniziada la Traversda chamonna Fenga – Sesvenna tras Georg Buchli, Peder Buchli, Stevan Zanetti e Cristian Juon. Il club ha lura surtut il patronadi e fuormà ün comité agiundscond pro'ls iniziants amo noss magisters Cla Rauch, Armon Nuotclà ed Andri Gritti.

Mincha duos ons, la prüma dumengia dal mais lügl traversa üna gronda brajada tuot il cuntegn da nos cumün da nord vers süd, la prüma jada dal 1987. Tuot in tuot üna distanza da 34.5 km, il prüm vaja da la chamonna sü 344 m sü Cuolmen Fenga, da là 1496 m aval fin Sur En, 1198 m amunt tras las gallarias sü Sursass / Pass da Schlingia, e lura amo ün tocket aval fin illa chamonna Sesvenna.

Per finir pro las ideas iniziativas da nos club as poja manzunar amo quella dal 1952, da metter sü üna coluonna da salvamaint stabla per nos cumün.

9. *Cun quai es üna part a fin, ho ho ho
Uossa giain no a baiver vin, ho ho ho
Madlaina giov'ün teaterin
cun ün hom vegl ed ün mattin
e lura pigl'il pled nos Nical
chi riva sü fich bain il pical*

Ref: Culs skis sun its

Chanzun dal Club Skiunzs Sent

Al Rezia eschan radunats, ho, ho, ho
chantar vulain e far nardats, ho, ho, ho.
Sch'eir vi pel di vain schaschinà,
cun telemarc', cristiania.
Las vuschs dal bass e dal tenor
strassunan tant plü bain in cor.

Refrain: Culs skis lain ir in chod e fraid
giodair la naiv e'l cler sulai,
amunt planet, aval sco'l vent
uschè s'fa quai a Sent.
EVIV' IL CLUB DA SENT!

Nos Sent es bain ün paradis, ho, ho, ho
per quel chi voul far sport da skis, ho, ho, ho
chi va dalöntschi e chi dasruschi
chi sün Soèr, chi vers Sotcrusch.
Sgür satisfat tuot es la sair'e
chanta our da spür plaschair.

Refrain: Culs skis lain ir in chod e fraid...

Cristiania, telemarc'e „Schuss“, ho, ho, ho
tuot chi sa far quai grondius, ho, ho, ho
sch'eir minchatant giond mass'amunt
as faja l'ultim ün bel punct.
Che'm porta quai la saira bain
chantar da cour listess chantain.

Refrain: Culs skis lain ir in chod e fraid...

Avant co ir lur'a durmir, ho, ho, ho
dischi ün „daman, ingio lain ir?“ , ho, ho, ho
“Culs skis“, respuondan tuots alur',
“daman s'pudess ir sü Vastur.“
Chantain perquai pür fich dadot,
schi vess da gnir eir mezzanot.

Refrain: Culs skis lain ir in chod e fraid...

Pleds: Chasper Sarott